



MEMORIA XUSTIFICATIVA E ECONÓMICA DO CONVENIO DE COLABORACIÓN ENTRE A AXENCIA GALEGA DE DESENVOLVEMENTO RURAL E A ASOCIACIÓN SEMENTE MONFORTE DE LEMOS PARA A POSTA EN MARCHA DUN PLAN DE FORMACIÓN E ASESORAMENTO A INICIATIVAS EMPRENDEDORAS DA COMARCA DE MONFORTE

Esta memoria elabórase para cumprir o previsto no artigo 15.2 da Lei 1/2016, do 18 de xaneiro, de transparencia e bo goberno e no apartado cuarto f) do Acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares.

ANTECEDENTES

A Axencia Galega de Desenvolvemento Rural (en adiante, Axencia) creouse pola disposición adicional sexta da Lei 5/2000, do 28 de decembro, de medidas fiscais e de réxime orzamentario e administrativo (DOG núm. 251, do 29 de decembro).

A dita lei de creación está modificada, entre outras, pola Lei 11/2021, do 14 de maio, de recuperación da terra agraria de Galicia (DOG núm. 94, do 21 de maio), en cuxo artigo 6 se configura a Axencia Galega de Desenvolvemento Rural como unha axencia pública autonómica, de conformidade coa Lei 16/2010, do 17 de decembro, de organización e funcionamento da Administración xeral e do sector público autonómico de Galicia, coa consideración de medio propio e servizo técnico da Comunidade Autónoma de Galicia, que actúa como instrumento básico na promoción e coordinación do desenvolvemento do territorio rural galego, co obxectivo de mellorar as condicións de vida dos seus habitantes e de evitar o seu despoboamento.

A Asociación Semente Monforte de Lemos é unha entidade de natureza asociativa de interese público e sen ánimo de lucro. Está inscrita no Rexistro Provincial de Asociacións da Comunidade Autónoma de Galicia co número 2014/018258-1ª e os seus estatutos definen como fins principais da entidade, entre outros, o apoio a iniciativas educativas de toda índole e a promoción e apoio a iniciativas empresariais e de emprendemento que radiquen en Monforte de Lemos. Esta asociación organiza o "Concurso de proxectos empresariais Semente Ribeira Sacra", co que se trata de buscar iniciativas de emprendemento e proxectos innovadores para desenvolver o medio rural e poñer en valor os seus recursos. No ano 2025 organizou a XI edición e como parte do recoñecemento ás iniciativas máis prometedoras, o concurso entrega tres premios valorados en 10.000,00 €, 6.000,00 € e 4.000,00 € respectivamente, ao que se incorpora a posibilidade de asesoramento especializado e un acompañamento experto nas áreas clave para o seu desenvolvemento.

RAZÓNS DE OPORTUNIDADE

O artigo 3 do Decreto 79/2001, do 6 de abril, polo que se aproba o Regulamento da Axencia establece que as funcións da axencia son, entre outras, promover e incentivar a

AXENCIA GALEGA DE DESENVOLVEMENTO RURAL
CONSELLERÍA DO MEDIO RURAL

Lugar da Barcia 56, Laraño
15897 Santiago de Compostela
T. + 34 981 547 354
infoagader@xunta.gal
agader.xunta.gal





cooperación entre os axentes públicos e privados cuxas actuacións incidan directa ou indirectamente no desenvolvemento das zonas rurais, xestionar os recursos públicos ou privados que se encomenden de maneira específica á dinamización das áreas rurais de Galicia así como, calquera outra acción que teña por obxectivo contribuír de forma eficaz á diversificación económica e á modernización do tecido produtivo rural. Así mesmo, o artigo 7 da Lei 11/2021, do 14 de maio, de recuperación da terra agraria de Galicia sinala que é competencia da Axencia, entre outras materias, deseñar e implementar estratexias para o desenvolvemento e a xestión do territorio rural que coordinen actuacións de diversa natureza e contén con participación dos axentes socioeconómicos públicos e privados, articular proxectos de desenvolvemento rural destinados a reforzar a bases produtiva das áreas rurais, valorizar os seus recursos e mellorar a calidade de vida dos seus habitantes, así como contribuír ao reforzo do tecido social e á mellora da capacidade organizativa das áreas rurais.

O obxectivo da Asociación Semente Monforte de Lemos é promover a solidariedade na Ribeira Sacra e "sementar" iniciativas que dean pulo ao desenvolvemento da bisbarra. Para acadar este obxectivo, entre outras actuacións, a asociación organiza o "Concurso de proxectos empresariais Semente Ribeira Sacra", co que se trata de buscar iniciativas de emprendemento e proxectos innovadores para desenvolver o medio rural e poñer en valor os seus recursos

Os intereses converxentes das partes asinantes xustifican a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, de 8 de novembro, de contratos do Sector Público, pola que se traspón ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, con independencia de que, de acordo co previsto no artigo 4 da devandita norma, lle sexan de aplicación os principios desta lei para resolver as dúbidas e lagoas que puidesen presentarse.

OBXECTIVOS

O convenio que está previsto tramitar ten por obxecto establecer as condicións polas que se rexerá a colaboración entre a Axencia Galega de Desenvolvemento Rural e a Asociación Semente Monforte de lemos para poñer en marcha un plan de formación e asesoramento a iniciativas emprendedoras da comarca de Monforte.

En concreto, este convenio regula as seguintes actuacións incluídas no plan de formación, asesoramento e difusión dos proxectos emprendedores que resultaron gañadores no "XI concurso de proxectos empresariais Semente da Ribeira Sacra":

- asesoramento individualizado por proxecto nos seguintes ámbitos:
 - o Mentorizaxe personalizada (4h) → para identificar os principais desafíos estratéxicos e deseñar solucións adaptadas á realidade de cada proxecto.
 - o Asesoramento en modelos de negocio sostibles (4h) → para estruturar iniciativas viables, rendibles e escalables, adaptadas ao contorno rural.
 - o Xestión financeira e acceso a financiamento (4h) → para mellorar a planificación económica e explorar fontes de financiamento públicas e privadas.
- obradoiro colaborativo baseado en metodoloxías innovadoras (Design Thinking / Lego Serious Play) co obxectivo de fomentar o networking, identificar sinerxías e crear redes de apoio entre os emprendedores participantes.





- accións de promoción e divulgación que garantan a máxima visibilidade do programa formativo e de asesoramento e, ao mesmo tempo a implicación directa da Axencia Galega de Desenvolvemento Rural no apoio ás iniciativas de emprendemento rural.
- Organización dunha mesa redonda sobre desenvolvemento rural

Este plan de formación e asesoramento axuda a complementar os desafíos particulares aos que se enfronta o emprendemento no rural: acceso limitado a financiamento, menor dinamismo nos ecosistemas de negocio, falta de redes de colaboración e a necesidade de modelos sostibles que combinen rendibilidade con impacto social e ambiental. Non se trata unicamente de fortalecer as capacidades individuais dos emprendedores, senón tamén tecer unha rede de colaboración entre proxectos, potenciando o desenvolvemento do tecido empresarial. A través de metodoloxías innovadoras e un enfoque práctico, garantirase que cada proxecto emprendedor reciba un asesoramento de alto valor, adaptado ás particularidades do territorio e ao seu sector de actividade.

Por tanto, o obxectivo común que perseguen as partes asinantes deste convenio de colaboración é revitalizar e dar visibilidade ao medio rural galego, poñer o foco en todo o seu potencial industrial e social e xerar estratexias e sinerxías para incrementar a competitividade e impulsar o crecemento e a xeración de riqueza na Galicia interior.

CUSTO ESTIMADO DO CONVENIO

O custo derivado da sinatura deste convenio calculouse con base nos seguintes gastos estimados:

Actuación	Horas	Formato	Importe
Mentoría personalizada	4	Individual	400 €
Asesoramento en modelos de negocios sustentables	4	Individual	400 €
Xestión financeira e acceso a financiamento	4	Individual	400 €
Taller grupal de networking e creatividade	3	Grupal	200 €
Material e seguimento		Dixital	100 €
Total por proxecto (IVE non incluído)			1.500 €
Total por proxecto (IVE incluído)			1.815 €
Total 9 proxectos			16.335 €

Este importe financiarase con cargo á conta orzamentaria 15.A1 712A 6403 código de proxecto 2015-00003.

Santiago de Compostela, na data da sinatura electrónica

A directora xeral Axencia Galega de Desenvolvemento Rural
M^a Paz Rodríguez Rivera

